

一人園記

古水

壬辰年四月廿七 / 2012-05-17

余自舊年乙未承乏，作則服事乎衙署，歸則曝形乎囂塵，是事亦迫我，形亦迫我，可寄情者止遠人、文字、庭園而已。

昭陵南有新開河，前朝張雨亭經略關東，見水陽爽塏高阜，誠哉勝地，乃奠東北大學之基于斯，余供職所在即其舊院落也。門裏牆外實無殊異，可愛者惟一園耳。

是園也，脩可千步，深才丈許，石徑蜿蜒其內，人工雖糙，有嘉樹夾道，差可補救。春夏代序，連翹、山櫻、丁香、稠李、刺槐、薔薇次第爭發，芳馥不絕。一旦花盡，迎風錯愕，遙憶昨日之託付，杳思青春之蕃華。

余行林中，時時佇步遐觀，但覺風清天朗，然異乎往來稀少，偶有長者策筇杖過，多亦蹙眉。知此間樂者余一人歟？

熟人謂余曰：「疇昔薄公視政，好營官苑，靡費千萬，此園精緻遠甚眼前。及去，藝人以手加額，園旋荒。」今薄公新見黜，若睹此園，未免生興廢之感。

于戲！古有云：「一言僨事，一人定國。」有諸已而後喻諸人，身修乃家齊，家齊乃國治。薄公之遭逢，或恐咎其驕佚而有失于政矣。

一人知此園憂樂，一人知此園廢興，呼之「一人園」，豈非宜哉？爰爲之記。